

Paulo Timóteore ape pũri ohâ nemoka pũri niî'

A'ti pũri a'tiro weéro ohâ no'opã niise niî'

Paulo Timóteore Romapi bu'fri da'reri wi'ipi niigi, ohâki niîwĩ. Kĩĩ a'ti pũrire ohâgi, kũĩ ohâ mi'taka pũri weero noho ohâtiki niîwĩ. Ásia di'takâharã kũĩ re bu'fri da'reri wi'ipi niikã, bopõya sãakãrã niîwã. Tohõ weegi niî pe'tirã kõ'ã wã'ka no'o'karo weero noho ti'õ yã'aki niîwĩ. Luca, tohõ niikã Onesíforo yã wi'ikâharã di'akĩ kũĩ re wãkũ tutuakã weerã, bu'fri da'reri wi'ipi niigire bopõya sãatikãrã niîwã. Paulo ni'kitã niisa' niî ti'õ yã'agi, kũĩ me'rakâharã waro Timóteore, Marco kũĩ tiropi pihĩoki niîwĩ. Trõadepi kũĩ kũũ'ke papérare, kũĩ yarõ asĩ busurore miifti dutigi nohota pihĩoki niîwĩ. Kũĩ “Maatã wërĩgisa”, niî wãkũki niîwĩ. A'ti pũri kũĩ ohâ tioka pũri niî'.

Paulo Timóteore ohâ'ke niî'

1 Yi'ĩ Paulo Jesu Cristo bese kũũ'ki niî'. Kũĩ yi'ĩ re Õ'ãkĩ hi iarõ nohota kũĩ yeé kitire werẽ dutigi o'õo'wĩ. A'te kitĩ a'tiro niî'. Õ'ãkĩ hi “Jesu Cristore êho peorãre katĩ nu'kukã weegĩti”, niĩki niîwĩ. Kũĩ ni'karo nohota yi'ĩ re teerẽ werẽ dutigi o'õo'wĩ.

²Timóteo, mi'ĩ re yi'ĩ ma'ligire ohâ!. Mi'ĩ Jesu Cristo yee kitire yi'ĩ werekã, ãyurõ êho peõwi. Tohõ weegi mi'ĩ yi'ĩ maki weero noho niî'. Õ'ãkĩ hi marĩ paki, tohõ niikã Jesu Cristo marĩ wiõgi mi'ĩ re ãyurõ weeãto. Pahã yã'ato. Mi'ĩ re ãyurõ ehẽri põ'ratikã weeãto.

Jesu Cristore êho peorã ãpẽrãre a'tiro weerõ iã' niise niî'

³Yi'ĩ Õ'ãkĩ hire sãrisétiri niki mi'ĩ re wãkũ!. Mi'ĩ re wãkũgi, yami, imĩ koho Õ'ãkĩ hire “Áyú!” niî'. Kũĩ re yi'ĩ yẽki simiã êho peõseti'karo nohota êho peó!. Yi'ĩ bu'fri moogi ti'õ yã'agi, kũĩ re êho peó!. ⁴Timóteo, mi'ĩ re pũuro wãkũ!. Yi'ĩ mi'ĩ tiropi ni'ki wihãakã, mi'ĩ uti'kere wãkũ nu'kukã!. Mi'ĩ re pũuro i'yã sĩ'risa!. Mi'ĩ re i'yãgi, e'katigiti niigi, tohõ wãkũ!. ⁵Mi'ĩ Jesu Cristore keorõ êho peõsere yi'ĩ wãkũ!. Mi'ĩ ni'kãroakã êho peõsere mi'ĩ yẽko Lóide, tohõ niikã mi'ĩ pako Eunice êho peó mi'tawã. Mi'ĩ kẽ'ra teerẽta êho peó siru tuugi weé!.

⁶Tohõ weegi mi'ĩ a'tiro weekã iã!. Õ'ãkĩ hi mi'ĩ re wee duti'kere tutuarõ me'ra weé nu'kukã'ya. Too dipóro yi'ĩ mi'ĩ re yãa peókã, Õ'ãkĩ hi mi'ĩ re ãyusé masisére o'õwĩ. Teerẽ nemorõ ãyurõ weé nu'kukã'ya.

⁷Ô'âkî hi marîre Espírito Santore o'ôo'wî. Kîîre o'ôo'gi, uî dutigi meheta o'ôwî. Tohó o'ôgi, tutuasé o'ogíre, ma'ísé o'ogíre, keoró wákusé o'ogíre o'ôwî. ⁸Tohó weégi marî wiôgi yee kitire werêgi, bopôyatikâ'ya. Yî'í kē'raré Jesu Cristo yee kiti bu'esé wapa, bu'îri da'rerî wi'ipi yî'í duhikâ, bopôya sāatikâ'ya. A'tîro pe'e weeyá. Jesu Cristo yee kitire werêya. Tohó weresé bu'îri mi'í kē'ra yā'áro yî'rigísa'. Tohó wa'aká î'yâgi, “Áyurósa”, ni'ya. Ô'âkî hi mi'íre tutuaró o'oró pōo tēoro tohó weeyá. ⁹Ô'âkî hi marîre pekâ me'epi wa'â boo'kārāre yî'ri wetíkā weewí. Kîî āyuró weesétisere î'yâgi meheta beséki ni'wî. Kîî pe'e marîre āyuró weé si'rigi beséki ni'wî. A'tîro ni'í. Ô'âkî hi marîre ma'ígi, Jesu Cristo marîre yî'rióatehere wākūki ni'wî. Teeré a'ti nukūkā weeatoho diporo wākū tohaki ni'wî. ¹⁰A'tóka tero maa marîre yî'riógi, Jesu Cristo a'tisé me'ra kîî ma'ísere î'yowí. Marî pekâ me'epi wa'â boo'kārāre yî'ri wetíkā weewí. Tohó niiká a'tîro masiká weewí. Marî kîî yî'rióse kitire ti'ó êho peórā, katî nu'kurāsa' niisére masiká weewí.

¹¹Ô'âkî hi tee kitíre yî'íre weré dutiwî. Judeu masa ni'tirāre bu'ê dutigi yî'íre bese kūuwî. ¹²Tee kitíre weresé bu'iri yî'í pūuro pi'etí'. Tohó pi'etímigi, bopôya wee'. Yî'í Jesu Cristore masí'. “Kîî ni'kere keoróta weegísami”, ni'í. Kîî tutuagí ni'imi. Yî'íre tee kití weré turiase kū'kere āyuró ko'té yapá da'reogísami. “Teé opāturi a'tígipi, ko'té nu'kugísami”, ni'í. Tohó weégi yî'í neé bopôya wee'.

¹³Yî'í mi'íre bu'ê'kere keoró bu'ê wā'kaya. Āyuró êho peósetiya. A'mêri ma'iyá. Marî Jesu Cristo me'ra ni'rá, tohó wee masí'. ¹⁴Espírito Santo marîpire ni'imi. Kîî wee tamúse me'ra Ô'âkî hi mi'íre weré dutigi kū'kere āyuró bu'êya.

¹⁵Mi'í masí toha! Ni'í pe'tirā Jesu Cristore êho peórā, Ásiakāharā yî'íre kō'á wiháa pe'tia wa'āwā. Naā wa'tero ni'kārā kē'ra Figelo, tohó niiká Hermógene meharóta weewá. ¹⁶Onesíforo pūriká tohó weetiwî. Ô'âkî hi kîîre, kîi yaá wi'ikāharāre pahá yā'agísami. Pehetíri Onesíforo yî'íre wākū tutuakā weewí. Apêye kē'raré yî'í bu'îri da'rerî wi'ipi ni'ímikā, yî'íre bopôya sāatiwî. ¹⁷A'tîro pe'e weewí. Kîî Romapi ehâgi, yî'íre ipítí a'māki ni'wî. Teé bokágipi, a'mā du'uwî. ¹⁸Marî wiôgi masaré beseátihi nimi Onesíforore pahá yā'ato. Kîî marîre Éfesopi wee tamú'kere mi'í āyuró masísa'.

Paulo Timóteore keoró wee dutí'ke ni'í

2 Timóteo, mi'í yî'í maki weeró noho niigíre a'tîro niigíti. Jesu Cristo mi'íre āyuró weemí. Tohó weégi kîî wee tamúse me'ra kîîre êho peó nu'kukā'ya. ²Yî'í pāhará masá ti'óropi bu'ê'kere weré turiaya. “Á'ratá yî'í bu'esére āpêrāre keoró weré turia ti'sama” ni'í, mi'í î'yará nohore werêya.

³Mi'í Jesu Cristo yee kitire weresé bu'iri mi'íre yā'áro wa'árosa'. Īsāre wa'á'karo weeró noho wa'árosa'. Mi'íre tohó wa'aká, wākū tutuaya. Surára weeró noho weeyá. Kîîre mehêkā wa'aká, wākū tutuasami. ⁴Surára kîî wiôgi dutisé di'akíre weesami. Surára ni'tigi weeró noho weetísami. Tohó weégi mi'í kîî weeró noho weeyá. Jesu Cristo yee di'akíre weeyá. ⁵Āpí kē'ra omagí kîî wiōrá dutisé nohore keoró weetígi, wapá ta'atísami. Naā kîîre o'ô boo'kere o'ôtisama. Tohó weégi āyusé boká si'rigi, Jesu Cristo dutí'kere keoró weeyá. ⁶Ni'kí wesepí āyuró da'ragí noho tii wesékāhase dikátise me'ra duā wapá ta'a masísami. Mi'í teé weeró noho Ô'âkî hi yeekāhasere āyuró bu'êgi, tee wapá mi'í kē'ra wapá ta'a masí'. ⁷Yî'í

weresére wākû niriya. Mi'î tohó weeká, marí wiôgi niî pe'tisere mi'îre masiká weegísami.

⁸ Jesu Cristore wākûya. Kîî wêrî'ki niîmigi, masáki niîwî. Kîîta diporókî hi wiôgi Davi paramí niî turiagi niîmi. Yi'î Jesu Cristo yee áyusé kitire werêgi, teeréta werêwi. ⁹ A'te kití weresé bu'iri yi'î pi'etísala. Yi'î yá'áro weegí weeró noho bu'iri da'reri wi'ipi niî'. Ô'âkî hi yee kiti pûriká niî pe'tiropi niî bi'a toha'. Yi'îre bu'iri da'reri wi'ipi bi'a dipó'ke weeró noho niî wee'. ¹⁰ Tohó weégi yi'î pi'etímigi, wākû tutua'. Ô'âkî hi besé'kârare áyuró wa'aáto niîgi tohó weé'. Naá kê'ra marí weeró noho Jesu Cristore êho peórâ, yi'rió no'orásama. Áyú butia'sere bokarásama. Katí nu'kuká'rásama. Tohó weégi niî pe'tisere wākû tutua'.

¹¹ A'tíro niisé diakî híta niî':

Marí Jesu Cristore êho peóse bu'iri âpêrâ wêhe boósama.

Naá tohó wêheká, marí Jesu Cristo me'ra i'mîsepi katí nu'kurása'.

¹² Marí pi'etírâ wākû tutuarâ, kîî wiôgi niirópi kîî me'ra wiôrá niîrása'.

“Kîîre masítisa” niiká, kîî kê'ra maríre “Masí wee”’, niîgisami.

¹³ Marí kîîre áyuró êho peótímiaká, kîî pe'le niî pe'tise “A'tíro weegíti” niî'kere keoró weé nu'kusami.

Ô'âkî hi neê ni'kâti niî soo masítisami.

Paulo Timóteore keoró bu'ê dutise niî'

¹⁴ Mi'î bu'eráre a'te dipóro yi'î ohâ'kere wākû dutiya. Âpêrâ uúkusetiri niki “Tohó meheta niî”’, niîsama. Diakî hí marí wiôgi ti'óropi naá tohó niísitiseré du'u dutíya. Teé uúkúse wapa marí. Âpêrâ wákúseré dohoré'ma. ¹⁵ Mi'î pe'le Ô'âkî hi yeere áyuró bu'êya. Tohó niiká kîi yeere keoró weeyá. Mi'î tohó weeká i'yâgi, mi'îre “Áyuró weemí”, niîgisami. Keoró weégi, mi'î da'rasére bopóyasome. Diakî hí kâhasere Jesu Cristo yee kitire keoró werê turiaya. ¹⁶ A'ti nukúkâkâhase diakî hí niítisere naá uúkúkâ, uúkû tamutiká'ya. A'tíro niî'. Teeré uúkûrâ, nemoró siápe me'ra yá'ará wa'ásama. ¹⁷ Naá bu'esé marí ipipí kamí boá se'saro weeró noho âpêrâre pe'ri pehá wá'kasa'. Á'rá piárâ Himeneu, Fileto teé boasé weeró noho masaré bu'êrâ, dohoré'ma. ¹⁸ Á'rá Ô'âkî hi yee kitire keoró bu'êtima. A'tíro niîma: “Masá wêrî'kârâ masá tohakârâ niîwâ”, niîma. Naá tohó niiká ti'órâ, âpêrâ “Í sâ de'ró êho peórásari baa?” niî wākûma. ¹⁹ Ô'âkî hi kîi uúkúse kû'ke pûriká tutuarí wi'í yeé ni'ko'ke weeró noho niî'. Kîi yeé kiti neê dika yúu wee'. A'tíro niî'. “Marí wiôgi Jesu Cristo kîi yaráre masísami.” Tohó niiká “Niî pe'tírâ ‘Jesu Cristo yarâ niî’”, niî wākúrá yá'áro weesére du'úato.”

²⁰ A'teré werêgiti. Ni'kí pehé kíogí yaá wi'ipire pehé bapâri níisa'. Ouro me'ra weé'ke paari, prata me'ra weé'ke paari níisa'. Tohó niiká apêye yukí me'ra weé'ke paari, di'í me'ra yeé'ke paari níisa'. Bosê nimi niiká áyusé paarire naá ba'á wiaropi peósama. Apêye paarire mehó niirí nimi peósama. ²¹ Marí a'te weeró noho yá'asére weetírâ, bosê nimi niiká áyusé paari peosé weeró noho niîrása'. Marí wiôgi yarâ waro niîrása'. Kîî niî pe'tise áyuró wee dutísere keoró weerása'.

²² Tohó weégi mi'î ma'mâ piha naá iâri pehase nohore weetíká'ya. Keoró weeyá. Jesu Cristore êho peóya. Masá kê'rare ma'iyá. Tohó

niiká a'me kēese mariró niíya. Nií pe'tirā keoró weerá Ô'âkî hire êho peorā me'ra āyuró niikā'ya. ²³Āpêrā tohō uúkū ma'akā, naā me'ra uúkū tamutikā'ya. Naā ti'o masítima. Mi'î masí', naā tohō uúkūrā naā iaró a'mé tu'ti yapatísama. ²⁴Mi'î marî wiôgire da'rá ko'tegi nií'. Neē a'mé tu'titikā'ya. A'tîro pe'e weeyá. Nií pe'tirā me'ra āyuró niíya. Naāre āyuró bu'ê, naā mi'î re yā'áro weē sî'rikā, tohō ti'ó yā'akā'ya. ²⁵Mi'î bu'esere ti'ó sî'ritirāre āyuró pahá yā'ase me'ra naāre “A'tîro pe'e āyuró weeyá”, niíya. Ô'âkî hi naā yā'áro weé'kere dika yuúgisami niîgi, tohō niíya. Naā dika yuúrā, diakî hí kâhasere êho peorásama. ²⁶Mi'î naāre teeré wereká, ti'o masírāsama. Tohō weerā wāti yará, kîi dutiró weemí'kārā yi'ri wetí wiháarāsama.

**“A'ti nukúkā pe'tiátotoho díporo pehé yā'asé wā'karósa”
nií'ke nií'**

3 Mi'î a'teré ti'o masíya. A'ti nukúkā pe'tiátotoho díporo pehé yā'asé wā'karósa'. A'tîro wa'árosas'. ²Masá naa yeékâhase di'akîre iarásama. Niyérure iári peharásama. “Āpêrā yi'rióro āyú yi'ri ni'ka”, nií wākúrāsama. Masí butia'rā weeró noho uúkū ma'arásama. Ô'âkî hire iatirā, yā'áro kîi re uúkúrāsama. Naā paki simiáre yi'rí ni'karásama. Āpêrā naāre āyuró weemíkā, “î sâre āyuró weeápi”, neē niísome. Wio pesáse me'ra Ô'âkî hire êho peósome. Marî êho peósetisere mehō niisere weeró noho wākúrāsama. ³Neē âpêrāre ma'isomé. Pahá yā'ase moorásama. Uukaháse piharā niírāsama. Naā no'ó iaró yā'áro weē sî'risere weerásama. Āpêrāre yā'áro pi'etikā weerásama. Neē kār'ó āyusere iasomé. ⁴Naā me'rakâharā niimi'kārāre yā'áro weerásama. No'ó iaró weē ma'akārāsama. Naā ipítî “Āpêrā yi'rióro āyú yi'ri ni'ka”, nií wākúrāsama. Ô'âkî hi pe'ere wākūro noho o'ôrá, e'katí niisétise noho di'akîre wākúrāsama. ⁵Ô'âkî hire êho peorā weeró noho wee soórāsama. Naā weesétise me'ra pe'e Ô'âkî hi tutuasere “Tohō nií wee'”, niírāsama.

Naā noho me'ra neē kār'ó ba'pâti ma'atikā'ya. ⁶Naā tohō weerá noho a'tîro weesamá. Uúkū me'rise me'ra wi'sêripi sâhâasama. Sâhâa, numiâ tiro too díporo yā'áro weé'kārā bu'iritirā, wākū tutuatirāre nií soo dohórê'sama. Naāre mehêkâ êho peókâ weesamá. Naā numia nií pe'tise yā'áro weesere iári pehasama. ⁷Nií pe'tise bu'esere masí sî'rimirā, neē diakî hí kâhasere masí tu'a ehatísama. ⁸Numiāre nií soorā piárā Jane, Jambre weeró noho niíma. Naā díporópi Moisé niíka teropire naā Egitokâharā ti'ó yā'arā nií'kārā niíwā. Naā Moisére î'yâ tu'tikārā niíwā. Diakî hí kâhasere neē iatíkārā niíwā. Naā weeró noho ā'rā kē'ra diakî hí kâhasere iatíma. Yā'áro wākū poo'kārā neē keoró êho peó masítima. ⁹Naā uúkū ma'ase maatá pe'tirósa'. Nií pe'tirā naā uúkūkā ti'órā, “Tohō nií ma'akārā weemá”, niírāsama. Moisére iatí'kārā Jane, Jambere weeró noho wa'árosas'. Tiítapire naā nií ma'asere masá masí'kārā niíwā. Meharóta taha ā'rā kē'rare naā nií ma'asere masírāsama.

Paulo Timóteore “A'tîro weeyá” kîi nií tio'ke nií'

¹⁰Mi'î pūrikā yi'î bu'esé nií pe'tisere āyuró masí'. Yi'î weesétisere, yi'î weē sî'risere masí'. Tohō niiká yi'î Ô'âkî hire êho peósere masí'. Āpêrā keoró weetikā, yi'î tohō ti'ó yā'asere mi'î masí'. Yi'î ma'isétisere, mehêkâ wa'aká wākū tutuasere mi'î masí'. ¹¹Masá yi'î re yā'áro weekā,

pi'etíwi. Nií pe'tise a'te makáripí wa'â'kere mi'í masí'. Antioquiapi, Icôniopi, Listrapí yi'í pi'etí'kere mi'í masí'. Pi'etisetiri níki marí wiôgi yi'íre yi'ri wetíká weewí. ¹²Diakí híta nií'. Jesu Cristore êho peórâ nií pe'tirâre Ô'âkí hi iaró noho âyuró weé sî'rirâre âpêrâ yâ'âro weerásama. ¹³Yâ'ará, tohó niiká nií soorâ nemoró yâ'âro wee nemó peorásama. Nií soo nemo wâ'karásama. Nií soorâ niímírâ, naá kê'ra nií soo no'o', êho peórásama.

¹⁴Mi'í pûrikâ mi'íre bu'ê'kere keoró êho peó nu'kukâ'ya. Keoró weeyá. Mi'í teeré "Diakí híta nií'", níisa'. Mi'í mi'íre bu'ê'kârâre masí'. ¹⁵Mi'í wi'magípita Ô'âkí hi yee kiti ohâka pûrikâhasere masí ni'kawí. Teeré bu'êgi, mi'í Ô'âkí hi yeere masíwi. Masí, Jesu Cristore êho peóse me'ra yi'rió no'owi. ¹⁶Ô'âkí hi yee kiti ohâka pûrikâhasere ohâ dutígi, kíí masisé o'osé me'ra ohâ dutíkí niíwi. Teé ohâ'kere bu'êrâ, diakí hí niisére masí no'o'. Marí yâ'âro weé'ke kê'rare "Yâ'â nií'", nií no'o'. Marí yâ'âro weé'kere díka yúú masaká weé'. Teeré bu'êrâ, keoró weé nu'ku masí'. ¹⁷Ô'âkí hi kíí yarâre nií pe'tise âyuró weesére wee masiáto níigi kíí yeékâhasere ohâ dutíkí niíwi.

4 Jesu Cristo nií pe'tirâ wiôgi tutuaró me'ra a'tígisami. A'tígi, masá katírâre, wêri'kârâre besegísami. Ô'âkí hi, tohó niiká Jesu Cristo tí'oropire mi'íre a'tíro wee dutí'. ²Masaré Ô'âkí hi yee kitire werêya. Nií pe'tisetiri masá tí'ó sî'rikâ, werêya. Naâ tí'ó sî'ritikâ kê'rare, weré nu'kukâ'ya. Mi'í weresére tí'orâ, êho peórásama. Naâ keoró weetíkâ, tu'tíya. "A'tíro weeró íá", nííya. Naâre bu'êgi, keoró pahá yâ'ase me'ra weré me'rikâ'ya. ³Be'ropíre masá âyusé bu'esére iatírásama. Tohó weégi a'tíro niikâre keoró bu'ê we'oya. Be'ropíre a'tíro wa'ârosa'. Naâ, naâ iaró weerásama. Naâ tí'ó tí'sase di'akíre tí'ó sî'rirâsama. Tohó weerâ teeré bu'eáhâ pâharâre a'mârasama. ⁴Naâ diakí hí kâhasere tí'osomé. Nií pe'tise no'ó weré ma'ase pe'ere tí'orâsama. ⁵Timóteo, mi'í pûrikâ keoró wákúya. Mi'í Jesu Cristo yee kitire werékâ, masá mi'íre yâ'âro weerásama. Naâ tohó weeká, wákú tutuaya. Jesu Cristo masaré yi'riómi niisé kitire du'u kúuro mariró weré nu'kukâ'ya. Mi'íre wee dutí'kere weé tu'a eha ni'koya.

⁶Yi'í wêriátoho kâ'ró dí'sá'. Yi'íre masá Ô'âkí hire wa'íkíráre í há moro peo'karo weeró noho wa'ârotiro weé'. Tohó weégi mi'íre tohó dutí'. ⁷Yi'í Jesu Cristo yee kitire werêgi, nií pe'tise yi'í tutuaró pôo têoro weewí. Nií pe'tise Ô'âkí hi yi'íre dutí'kere tu'â eha toha'. Neé kííre êho peó du'u weel'. ⁸Ni'kâroakâre maha Ô'âkí hi yi'íre âyuró weé'ke wapa o'oátehe dí'sá'. Marí wiôgi Ô'âkí hi masaré beseátíhi nimi niiká, yi'íre o'ôgisami. Kíí masaré keoró besemí. Yi'í di'akíre o'ôsomé. Nií pe'tirâ kííre êho peórâ kíí a'tiátehere iarâre o'ôgisami.

Paulo kíí yeékâhasere weré'ke nií'

⁹Mi'í no'ó niisé me'ra yi'íre imî yaro í'yâgi a'tiá. ¹⁰A'tíro nií'. Crescente wamêtígi Galácia wamêtiropi wa'âwí. Tohó niiká Tito Dalmáciapi wa'âwí. Dema pûrikâ a'ti imí kohokâhasere nemoró ma'í yi'ri ni'kagi, yi'íre kô'â wâ'ka wa'âwí. Kíí Tessalónicapi wa'âwí. ¹¹Luca di'akí yi'í me'ra níimi. Marcore a'mâya. Mi'í me'ra a'tiáto. Kíí yi'íre wee tamúsere íá'. ¹²Yi'í Tíquicore Éfesopi o'ôowi. ¹³Mi'í a'tígi, yaró su'tíro así busuro bu'íkâharore miítia. Toó Trôade wamêtiri maka Carpo yaa wi'ipi níisa'. Yeé papéra tûrurire miítia. Wa'íkírá kaseri me'ra ohâ'ke yee kasérire akobohóti butia'ká'ya.

¹⁴ Alexandre komé me'ra da'ragí yí'íre yā'â butia'ro weewí. Ô'âkí hi marí wiôgi kíí weé'karo ehâ tu'aro kííre bu'íri da'régisami. ¹⁵ Mí'í pūrikā kííre tí'o masíya. Kíí marí bu'esére neê iatí yí'riami.

¹⁶ Neê waro wiôrá yí'íre sērí yā'akā, neê ni'kí yí'íre wee tamútiwí. Ní pe'tirā yí'íre kō'â wā'ka wa'āwā. Ô'âkí hi naâ tohō weé'kere akobohókā íá'. ¹⁷ Ô'âkí hi pūrikā yí'íre wee tamúwí. Yí'íre tutuasé o'ôwí. Tohō weégi wiôráre yí'í a'tíro werēwi. Jesu Cristo masá yā'áro niisétikere yí'riómi niisé kitire naâre werê pe'okā'wi. Ní pe'tirā a'ti ímí kohokāharā Judeu masa niítirā tee kitíre tí'oáto nígi tohō werēwi. Apēye kē'rare Ô'âkí hi yí'íre a'tíro weewí. Yaíwa ba'â no'o boo'kire weeró noho wiosé wa'teropi níigíre yí'ri wetíkā weewí. ¹⁸ Tohō niiká ní pe'tise yí'íre be'ropí yā'áro weeátehere yí'ri wetíkā weegísami. Ímísepi kíí wiôgi níirópi yí'íre miáagísami. Masá Ô'âkí hire áyuró uúkú nu'kuato. Tohōta wa'aáto.

Paulo áyu dutí tio'ke ní'

¹⁹ Priscila, Áquila áyuáto. Tohō niiká Onesíforo yaa w'ikāharā kē'ra áyuáto. ²⁰ Erasto Corintopi tohā ke'awí. Tróximo maa do'átigire Miletopi kō'â wā'katiwi. ²¹ Pu'êki díporo imíyaro a'tí bakeo'ya. Êubulo, Prudente, Lino, Cláudia, ní pe'tirā marí akawerérā mí'íre áyu dutíma.

²² Jesu Cristo marí wiôgi mí'í me'ra níiáto. Ô'âkí hi misá ní pe'tirāre áyuró weeáto.

Toô ká'rota ohâ'.

Paulo